

# Tge capita cun ils archivs circuitals?

Ura da dumondas dal parlament grischun

■ (anr/fa) En ils archivs dals 39 circuls sa chattan trais kilometers dad actas e documents degns da vegnir archivads. Per cumparegliaziun: En l'archiv statal a Cuira mesiran ins otg kilometers actas e documents istorics. *Brigitta Hitz-Rusch* (pld, Churwalden) ha rendì attent a chaschun da l'ura da dumondas ch'i sajan bleras actas istoricas en ils archivs circuitals. «Ils circuls vegnan dentant abolids a chaschun da la refurma territoriala, tge schabegia uss cun quels archivs?» Cussegliera guvernativa *Barbara Janom Steiner* ha respus che quels archivs circuitals mantegnian lur impurtanza era suenter la refurma territoriala. Per savair tge ch'i duai capitar cun las actas e documents en quels ha fatg l'uffizi per vischnancas ina retschertga tar ils 39 circuls: «La gronda part dals circuls vulless mantegnair quel material en las regions», ha communitgà la cussegliera guvernativa in emprim resultat da l'evaluaziun da quista retschertga, «sche las actas restan en las regions èn alura las regions responsablas per ellas.» Ella suppona che las regions vegnian a concentrar ils singuls archivs circuitals en in archiv per region.

## «Resguardond ils basegns individuals dals uffants»

*Sandra Locher Benguerel* (ps, Cuira) ha menziunà ils rapports dal «SRF Regionaljournal Graubünden» al cumenzament da november: «Tranter auter èsi vegnì rapportà ch'ils uffants en il center d'asil Löwenberg a Schluain hajan fin 400 lecziuns l'onn damain che uffants a la scola populara.» Cusseglier guvernativ *Martin Jäger* ha infurmà che l'uffizi per la scola populara e sport surveglia la scola en il center Löwenberg: «L'instrucziun serva qua a la preparaziun per pudair frequentar la scola regulara», ha el ditg e rendì attent a las fitg grondas differenzas tar ils uffants, «perquai èsi impurtant da chattar schliaziuns flexiblas cun la finamira da resguardar ils basegns da mintga singul uffant.»

Sandra Locher ha dumandà sche la regenza prevesia da decider mesiras per pudair definir criteris generals per entrar en la sola regulara. Il cusseglier guvernativ ha repetì che las premissas sajan uschè differentas ch'i saja «nunpusaivel da decider prescripziuns valaivlas per tuts.»



La gronda part dals circuls vul mantegnair las actas ed il material archivà en las regions.